

南  
北  
史  
合  
注

欽定四庫全書

南北史合注卷一百八十七

明 李清 撰

列傳第八十九

北史一百一

西域

夏書稱西戎即序班固云就而序之非盛威武致其貢物也漢初開西域有三十六國後分立五十五王置校尉都護撫之王莽篡位西域遂絕後漢班超所通者五

十餘國西至西海東西萬里皆來朝貢復置都護校尉  
相統其後或絕或通漢以為勞弊中國其官時置時廢  
暨魏晉後互相吞滅不可詳記道武初經營中原未暇  
及四表既而西戎之貢不至有司奏依漢氏故事請通  
西域可振威德於荒外致奇貨於天府帝曰漢氏不保  
境安民乃遠開西域使海內虛耗何利之有今若通之  
前弊復加于民矣遂不從歷明元世竟不招納太延中  
魏德益遠聞西域龜茲疏勒烏孫悅般渴槃陀鄯善焉

者車師粟特諸國王始遣使來獻太武以西域漢世雖  
通有求則卑辭而來無欲則驕慢王命此其自知絕遠  
大兵不可致故也若報使往來終無所益欲不遣使有  
司奏九國不憚遐嶮遠貢方物當與其進安可豫抑後  
來乃從之于是始遣行人王恩生許綱等西使恩生出  
流沙為柔然所執竟不果達又遣散騎侍郎董琬高明  
等多賁錦帛出鄯善招撫九國厚撫之初琬等受詔便  
道之國可往赴之琬過九國北行至烏孫國其王得魏

賜拜受甚悅謂琬等曰傳聞破洛耶者舌皆思魏德欽稱臣致貢但患其路無由耳今使君等到此可往二國副其慕仰之誠琬于是自向破洛耶遣使者烏孫王為發導譯達二國琬等宣詔慰賜之已琬明東還烏孫破洛耶之屬遣使與琬俱來貢獻者十有六國自後相繼而來不間于歲國使亦數十輩矣初太武每遣使西域常詔河西王沮渠牧犍護送至姑臧牧犍恒發使導路出于流沙後使者自西域還至武威牧犍左右謂使者

曰我君承柔然吳提妄說謂去歲魏天子自來伐我士  
馬疫死大敗而還我擒其長弟樂平王丕我君大喜宣  
言國中又聞吳提遣使告西域諸國魏已削弱今天下  
唯我為強若更有魏使勿復恭奉西域諸國亦有貳且  
收捷事主稍似慢情使還具以狀聞太武遂議討收捷  
涼州既平鄯善國以為唇亡齒寒自然之道今武威為  
魏所滅次及我矣若通其使人知我國事取亡必近不  
如絕之可以支久乃斷塞行路西域貢獻歷年不入後

平鄯善行人復通始琬等還京具言凡所經見及傳聞  
傍國云西域自漢武時五十餘國後稍相并至太延中  
為十六國分其地為四域自葱嶺以東流沙以西為一  
域葱嶺以西海曲以東為一域者舌以南月氏以北為  
一域兩海之間水澤以南為一域內諸小渠長蓋以百  
數其出西域本有二道後更為四出自玉門度流沙西  
行二千里至鄯善為一道自玉門度流沙北行二千二  
百里至車師為一道從莎車西行一百里至葱嶺葱嶺

西一千三百里至伽倍為一道自莎車西南五百里葱  
嶺西南一千三百里至波路為一道若琬所不傳而更  
有朝貢者紀其名不能具國俗也東西魏時中國方擾  
及于齊周不聞事西域故二代書並不立記錄隋開皇  
仁壽間尚未經畧煬帝時乃遣侍御史韋節司隸從事  
杜行滿使於西藩諸國至罽賓得瑪瑙盃王舍城得佛  
經史國得十舞女郎子皮火鼠毛而還帝復令聞嘉公  
裴矩往來武威張掖間引致之其有君長者四十四國



矩因其使者入朝啗以厚利令轉相諷諭大業中相率  
來朝者四十餘國因置西戎校尉應接之尋中國大亂  
朝貢遂絕事多亡失所存錄者二十國魏時所來在隋  
亦有不至今摠而編次以備前書 西域傳云至於道  
路遠近物產風俗詳諸前史或有不同斯皆錄其當時  
以備遺闕云

鄯善國都杆泥城古樓蘭國也去代七千六百里所都  
城方一里地多沙鹵少水草北即白龍堆路太延初始

遣其弟素延者入侍太武平涼州沮渠收捷弟無諱走  
保燉煌無諱後謀渡流沙遣其弟安周擊鄯善其王比  
龍懼欲降會魏使者自天竺劉賓還俱會鄯善勸比龍  
拒之遂與連戰安周不能克退保東城後比龍懼率衆  
西奔且末其世子乃應安周鄯善人頗剽劫之今不得  
通太武詔散騎常侍成周公萬度歸乘傳發涼州兵討  
之度歸到燉煌留輜重以輕騎五千渡流沙至其境時  
鄯善人衆布野度歸勅吏卒不得侵掠邊守惑之皆望

旗稽服其王真達而縛出降度歸釋其縛留軍屯守與  
真達詣京都太武大悅厚待之是歲拜交趾公韓牧為  
假節征西將軍領護西戎校尉鄯善王以鎮之賦役其  
人比之郡縣

且末國都且末城在鄯善西去代八千三百二十里真  
君三年鄯善王比龍避沮渠安周難率國人之半奔且  
末後役屬鄯善且末西北有流沙數百里夏日有熱風  
為行旅患風之所至唯老駝預知之即鳴而聚立埋其

口鼻於沙中人每以為候亦即將氈擁蔽鼻口

此事隋書載之吐谷渾或其風俗皆同乎抑誤也

其風迅駛斯須過盡若不防者必至危斃大統八年其  
凡鄯善米率衆內附

于闐國在且末西北葱嶺之北二百餘里東去鄯善千  
五百里南去女國三千里去朱俱波千里北去龜茲千  
四百里去代九千八百里其地方亘千里連山相次所  
都城方八九里部內有大城五小城數十于闐城東三

十里有首拔河中出玉石土宜五穀并桑麻山多美玉  
有好馬駝騾其刑法殺人者死餘罪各隨輕重懲罰之  
自外風俗物產與龜茲畧同俗重佛法寺塔僧尼甚衆  
王尤信尚每設齋日必親洒掃饋食城南五十里有贊  
摩寺即昔羅漢比丘盧旃為其王造覆盆浮圖之所石  
上有辟支佛跣處雙跡猶存于闐西五百里有比摩寺  
是老子化胡成佛之所俗無禮義多盜賊淫縱自高昌  
以西諸國人深目高鼻唯此一國貌不甚胡頗類華夏

城東二十里有大水北流號樹枝水即黃河也一名計  
式水城西十五里亦有大水名達利水與樹枝水會俱  
北流真君中太武詔高涼王邕擊吐谷渾慕利延懼率  
其部落渡流沙邕進軍急追之慕利延遂西入于闐殺  
其王死者甚衆獻文末柔然冠于闐于闐患之遣使素  
目加上表曰西方諸國今皆已屬柔然奴世奉大國至  
今無異今柔然軍馬到城下奴聚兵自固故遣使奉獻  
遙望救援帝詔公卿議之公卿奏曰于闐去京幾萬里

蠕蠕之性唯習野掠不能攻城若為所拒當已旋矣雖欲遣師勢無所及帝以公卿議示其使者亦以為然於是詔之曰朕承天理物欲令萬方各安其所應勅諸軍以拯汝難但去汝遐阻政復遣援不救當時之急是以停師汝宜知之朕今練甲養卒一二歲間當躬率猛將為汝除患汝其謹警候以待大舉先是朝廷遣使者韓羊皮使波斯波斯王遣使獻馴象及珍物經于闐于闐中子王秋仁輒留之假言慮有寇不達羊皮言狀帝怒

又遣羊皮奉詔責讓之自後每使朝貢周建德三年其  
王遣使獻名馬隋大業中頻使朝貢其王姓王字早示  
門練錦帽金鼠冠妻帶金花其王髮不令人見俗言若  
見王髮年必儉去

蒲山國故皮山國居皮城在于聞南去代一萬二千里  
其國西三里有凍凌山後役屬于聞

悉居半國故西夜國一名子合其王號子治呼提在于  
聞之西去代一萬二千九百七十里大延初遣使來獻



自後貢使不絕

權于摩國故烏秣國其王居烏秣城在悉居半西南去  
代一萬二千九百七十里

渠莎國居故莎車城在子合西北去代一萬二千九百  
八十里

車師國一名前部其王居交河城去代萬五千里其地  
北接柔然本通使交易太武初始遣使朝獻詔行人王  
恩生許綱等出使恩生等始度流沙為柔然所執恩生

見柔然吳提持魏節不為之屈後太武切讓吳提吳提  
懼乃遣恩生等歸許綱到燉煌病死朝廷壯其節賜諡  
曰貞初沮渠無諱兄弟之渡流沙也鳩集遺人破車師  
國真君十一年車師王車夷落遣使琢進薛直上書曰  
臣亡父僻處塞外仰慕威德遣使奉獻不空於歲天子  
降念賜遺甚厚及臣繼立亦不闕常貢天子垂矜亦不  
異前世敢緣至恩轍陳私懇臣國自為無諱攻擊經今  
八歲人民飢荒無以存活賊今攻臣甚急臣不能自全

遂舍國東奔三分免一即日已到焉耆東界思歸天闕  
幸垂賑救於是下詔撫慰開焉耆倉給之正平年遣子  
入侍自後每使朝貢不絕

高昌者車師前王之故地漢之前部地東西二百里南  
北五百里四面多大山或云昔漢武遣兵西討師旅頓  
弊其中尤困者因住焉地勢高敞人庶昌盛因名高昌  
亦云其地有漢時高昌壘故以為國號東去長安四千  
九百里漢西域長史及戊己校尉並居于此晉以其地

為高昌郡張軌呂光沮渠蒙遜據河西皆置太守統之  
去燉煌十三日行國有八城皆有華人地多石磧氣候  
溫暖厥土良沃穀麥一歲再熟宜蠶多五果又饒漆有  
草名芊刺其上生蜜味甚佳引水溉田出赤鹽味甚美  
復有白鹽其形如玉高昌人取以為枕貢之中國多蒲  
桃酒俗事天神兼信佛法國中羊馬牧在隱僻處以避  
寇非貴人不知其處北有赤石山七十里有貪汗山夏  
有積雪此山鐵勒界也太武時有闕爽者自為高昌太

守太延中遣散騎侍郎王恩生等使高昌為柔然所執  
真君中爽為沮渠無諱所襲奪據之無諱没弟安周代  
立和平元年為柔然所并

資治通鑑曰柔然殺安周滅沮渠氏

柔然以闕伯周為高昌王稱王自此始太和初伯周卒  
子義成立歲餘為從兄首歸所殺自立為高昌王五年  
高車王可至羅殺首歸兄弟以燉煌人張猛明為王後  
為國人所殺立馬儒為王以鞏願禮麴嘉為左右長史

二十一年遣司馬王體元奉表朝貢請師迎接求舉國  
內徙孝文納之遣明威將軍韓安保率騎千餘赴之割  
伊吾五百里以儒居之至羊棧水儒遣嘉禮率步騎一  
千五百迎安保去高昌四百里而安保不至禮等還高  
昌安保亦還伊吾安保遣使韓興安等十二人使高昌  
儒復遣顧禮將其世子義舒迎安保至白棘城去高昌  
百六十里而高昌舊人戀土不願東遷相與殺儒立麴  
嘉為王嘉字靈鳳金城榆中人既立又臣于柔然邪蓋

顧禮與義舒隨安保至洛陽及柔然主伏圖為高車所殺嘉又臣高車初前部胡人悉為高車所徙入於焉耆焉耆又為噉嚙所破滅國人分散衆不自立請王於嘉嘉遣第二子為焉耆王以主之熙平元年嘉遣兄子私署左衛將軍田地太守孝亮朝京師仍求內徙乞軍迎援於是遣龍驤將軍孟威發涼州兵三千人迎至伊吾失期而反後十餘遣使獻珠像白黑貂裘名馬鹽枕等款誠備至唯賜優旨卒不重迎三年嘉遣使朝貢宣武

又遣孟威詔勞之延昌中以嘉為持節平西將軍瓜州  
刺史秦臨縣開國伯私署王如故熙平初遣使朝獻詔  
曰卿地隔關山境接荒漠頻請朝援徙國內遷雖來誠  
可嘉于理未帖何者彼之昨庶是漢魏遺黎自晉氏不  
綱因難播越成家立國世積已久惡徙重遷人懷戀舊  
今若動之恐異同之變爰在肘腋不得便如來表也神  
龜元年冬孝亮復表求援內徙不許正光元年孝明遣  
假員外將軍趙義等使于嘉嘉朝貢不絕又遣使奉表



自以邊遐不習典誥求借五經諸史并請國子助教劉  
雙為博士孝明詔許之嘉卒贈鎮西將軍涼州刺史子  
堅立後關中賊亂使命遂絕晉泰初堅遣使朝貢除平  
西將軍瓜州刺史泰臨縣伯王如故又加衛將軍至永  
熙中特除儀同三司進為郡公後遂隔絕大統十四年  
詔以其世子元嘉為王恭帝二年又以其田地公茂嗣  
位武成元年其王遣使獻方物保定初又遣使來貢其  
國周時城有一十六後至隋時城有十八其都城周圍

一千八百四十步於坐室畫魯哀公問政于孔子像官  
有令尹一人比中夏相國次有公二人皆王子也一交  
河公一田地公次有左右衛次有八長史曰吏部祠部  
庫部倉部主客禮部戶部兵部等長史次有五將軍曰  
建武威遠陵江殿中伏波等將軍次有八司馬長史之  
副次有侍郎校郎主簿從事階位相次分掌諸事次有  
省事專掌導引其大事決于王小事則世子及二公隨  
狀斷決評章錄記事訖即除籍書之外無以掌文案官



人雖有列位並無曹府惟每早集于牙門評議衆事諸城各有戶曹水曹田曹城造司馬侍郎相監檢校名為城令服飾丈夫從胡法婦人裙襦頭上作髻其風俗政令與華夏略同兵器有弓箭刀楯甲褚文字亦同華夏兼用胡書有毛詩論語孝經置學官弟子相教授雖習讀之而皆為胡語賦稅則計田輸銀錢無者輸麻布刑法風俗昏姻喪葬與華夏小異大同自燉煌向其國多砂磧茫然無有蹊徑欲往者尋人畜骸骨而去路中或

聞歌哭聲行人尋之多致亡失蓋魑魅魍魎也故商客  
往來多取伊吾路開皇十年突厥破其四城有二千人  
來歸中國堅卒子伯雅立其大母本突厥可汗女父死  
突厥令依其俗伯雅不從久之突厥逼之不得已而從  
煬帝即位引致諸蕃大業四年遣使貢獻帝待其使甚  
厚明年伯雅來朝因從擊高麗還尚宗室女華容公主  
八年冬歸蕃下令國中曰先者以國邊處荒境同人無  
咎被髮左衽今大隋統御宇宙平一孤既沐浴和風庶

均大化其庶人以上皆宜解黻削衽帶聞而善之下詔  
曰光祿大夫升國公高昌王伯雅本自諸華世祚西壤  
昔因多難翦為胡服自我皇隋平一宇宙伯雅踰沙志  
阻奉貢來庭觀禮容于舊章慕威儀之盛典削衽曳裾  
變夷從夏可賜以衣冠仍班其製造之式

隋書曰并遣使人部令將送被以采章復見車服之  
美棄彼毳毼遂為冠帶之國

然伯雅先臣鐵勒恒遣重臣在高昌有商胡往來者則

稅之送于鐵勒雖有此令取悅中華然竟畏鐵勒不敢改也自是歲貢方物

且彌國都天山東于大谷在車師北去代一萬五百七十里本役屬車師

焉耆國在車師南都員渠城白山南七十里漢時舊國也去代一萬二百里其王姓龍名鳩尸畢邠即前涼張軌所討龍熙之盾所都城方二里國內凡九城國小民貧無綱紀法令兵有弓刀甲稍婚姻畧同華夏死亡者

皆焚而後葬其服制滿七日即除之丈夫並剪髮為首飾文字與婆羅門同俗事天神並崇信佛法尤重二月八日四月八日是日也其國皆依釋教齋戒行道氣候寒土田良沃穀有稻粟菽麥畜有駝馬養蠶不以為絲唯充綿纈俗尚蒲桃酒兼愛音樂南去海十餘里有魚鹽蒲葦之饒東去高昌九百里西去龜茲九百里皆砂磧東南去瓜州二千二百里恃地多險頗剽劫中國使太武怒之詔成周公萬度歸討之約齋輕糧取食路次

度歸入焉耆東界擊其邊守左迴尉犁二城拔之進軍  
圍員渠鳩尸畢卵以四五萬人出城守險以拒度歸募  
壯勇短兵直往衝鳩尸畢卵其衆大潰盡虜之單騎走  
入山中度歸進屠其城四鄙諸戎皆降服焉耆為國斗  
絕一隅不亂日久獲其珍奇異玩殊方譎詭難識之物  
索駝馬牛雜畜巨萬時太武幸陰山北宮度歸破焉耆  
露板至帝省訖賜司徒崔浩書曰萬度歸以五千騎經  
萬餘里拔焉耆三城獲其珍奇異物及諸委積不可勝



數自古帝王雖云即序西戎有如指注不能控引也朕  
今手把而有之如何浩上書稱美遂命度歸鎮撫其民  
初鳩尸畢那走山中猶冀城不拔得還其國既見盡為  
度歸所剋乃奔龜茲龜茲以其壻厚待之周保定四年  
其王遣使獻名馬隋大業中其王龍突騎支遣使貢方  
物是時其國勝兵千餘人而已

龜茲國在尉犁西北白山之南一百七十里都延城漢  
時舊國也去代一萬二百里其王姓白即後涼呂

光所立白震之後王頭繫綵帶垂于後坐金獅子牀所  
居城方六七里其刑法殺人者死劫賊則斷其一臂并  
則一足賦稅準地增租無田者稅銀風俗婚姻喪葬物  
產與焉耆略同唯氣候少溫為異又出細氈饒銅鐵鉛  
麋皮氍毹沙鹽綠雌黃胡粉安息香良馬犂牛等東有  
輪臺即漢貳師將軍李廣利所屠者其南三百里有大  
河東流號計戍水

魏書作  
式水

即黃河也東去焉耆九百里

南去于闐一千四百里西去疏勒一千五百里北去突

厥牙六百餘里東南去瓜州三百里其東關城寇竊  
非一太武詔萬度歸率騎一千擊之龜茲遣烏羯目提  
等領兵三千拒戰度歸擊走之斬二百餘級大獲駝馬  
而還俗性多淫置女市收男子錢入官土多孔雀羣飛山  
谷間人取而食之孳乳如雞鷩其王家恒有千餘隻國  
西北大山中有如膏者流出成川行數里入地狀如餒  
餉甚臭服之髮齒已落者能令更生厲人服之皆愈自  
後每使朝貢周保定元年其王遣使來獻隋大業中其

王白蘇尼咂遣使朝貢方物是時其國勝兵可數千人  
姑默國居南城在龜茲西去代一萬五百里役屬龜茲  
溫宿國居溫宿城在姑默西北去代一萬五百五十里  
役屬龜茲

尉頭國居尉頭城在溫宿北去代一萬六百五十里役  
屬龜茲

烏孫國居赤谷城在龜茲西北去代一萬八十里其國  
數為柔然所侵西徙葱嶺山中無城郭隨畜牧逐水草

大延三年遣使者董琬等使其國後每使朝貢

疏勒國在姑默西白山南百餘里漢時舊國去代一萬  
一千二百五十里文成末其王遣使送釋迦牟尼佛袈  
裟一長二丈餘帝以審是佛衣應有靈異遂焚之以驗  
虛實置猛火上經日不燃觀者莫不悚駭心形俱肅其  
王戴金師子冠土多稻粟麻麥銅鐵錫雌黃每歲供送  
突厥其都城方五里國內有大城十二小城數十人手  
足皆六指產子非六指不育勝兵二千人南有黃河西

帶葱嶺東去龜茲千五百里西去發汗國千里南去朱  
俱波八九百里東北至突厥牙帳千里餘東南去瓜州  
四千六百里隋大業中遣使貢方物

悅般國在烏孫西北去代一萬九百三十里其先匈奴  
比單于部落為漢車騎將軍竇憲所逐北單于度金微  
山西走康居其羸弱不能去者住龜茲國地方數千里  
衆可二十餘萬涼州人猶謂單于王風俗言語與高車  
同而於胡俗獨清潔剪髮齊眉以飾餽塗之昱昱然光

澤日三澡漱然後飲食其國南界有火山山傍石皆煤  
鎔流地數十里乃凝堅人取為藥即石流黃也與柔然  
結好其王嘗將數千人入柔然國欲與大檀相見及入  
界百餘里見其部人不浣衣不綈髮不洗手婦人口舐  
器物王謂其從臣曰汝曹誑我將我入狗國乃馳還大  
檀遣騎追之不及自是相仇讎數相征討真君九年遣  
使朝獻并送幻人稱能割人喉脉令斷擊人頭令骨陷  
背血出或數升或盈斗以草藥內其口令嚙咽之須臾

血止養瘡一月復常又無痕癥太武疑其虛乃取死囚  
試之皆驗云中國諸名山皆有此草乃使人受其術厚  
遇之又言其國有大術者柔然來抄掠術人能作霖雨  
盲風大雪及行潦柔然凍死漂亡者十二三是歲再遣  
使朝貢求與官軍東西齊契討柔然太武嘉其意中外  
諸軍戒嚴以淮南王他為前鋒襲柔然仍詔有司以其  
鼓舞之節施於樂府自後每使朝貢

者至拔國都者至拔城在疏勒西去代一萬一千六百



二十里其國東有藩賀那山出美鐵及獅子

迷密國都迷密城在者至拔西去代一萬二千一百里  
正平元年遣使獻一峯黑橐駝其國東有山名郁悉滿  
山出金玉亦多鐵

悉萬斤國都悉萬斤城在悉密西去代一萬二千七百  
二十里其國南有山名伽色那山出獅子每使朝貢  
怛密國都怛密城在悉萬斤西去代二萬二千八百二  
十八里

洛那國故大宛國都貴山城在疏勒西北去代萬四千  
四百五十里太和三年遣使獻汗血馬自此每使朝貢  
粟特國在葱嶺西古之奄蔡一名溫那沙居太澤在康  
居西北去代一萬六千里先是匈奴殺其王而有其國  
至王忽倪已三世矣其國商人先多詣涼土販貨及魏  
克姑臧悉見虜文成初粟特王遣使請贖詔聽之自後  
恒朝獻周保定四年其王遣使貢方物

波斯國都宿利城在怛密西古條支國去代二萬四千

二百二十八里城方十里戶十萬餘河經其城中南流  
土地平正出金銀鍮石珊瑚琥珀車渠瑪瑙多大真珠  
頗梨瑠璃水精瑟瑟金剛火齊鑛鐵銅錫朱硃水銀綾  
錦疊毼毼氍毹毼赤麋皮及薰陸鬱金蘇合青木等香  
胡椒草撥石蜜千年棗香附子訶梨勒無食于鹽綠雌  
黃等物氣候暑熱家自藏冰地多砂磧引水溉灌其五  
穀及鳥獸等與中夏略同唯無稻及黍稷土出名馬大  
驢及駝往往有一日能行七百里者富室至有數千頭

又出白象獅子大鳥卵有鳥形如索隄兩翼飛不能高  
食草與肉亦能噉火其王姓波氏名斯坐金羊牀戴金  
花冠衣錦袍織成帔飾以真珠寶物其俗丈夫剪髮戴  
白皮帽貫頭衫兩箱近下開之亦有巾帔緣以織成婦  
女服大衫披大帔其髮前為髻後披之飾以金銀花仍  
貫五色珠絡之於膊王於國內別有小牙十餘所猶中  
國離宮也每年四月出遊處之十月乃還王即位以後  
擇諸子內賢者密書其名封於庫諸子及大臣莫知王

卒衆共發書視之其封內有名者即位為王餘子出就邊任兄弟更不相見國人號王曰鑿噴妃曰防步率王

諸子曰殺野大官有撲

一作模

胡壇掌國內獄訟泥忽汚

掌庫藏開禁地早掌文書及衆務次有過羅訶地掌王內事薛波教掌四方兵馬其下皆有屬官分統其事兵有甲稍圓排劍弩弓箭戰乘象百人隨之其刑法重罪懸諸竿上射殺之次繫獄新王立乃釋之輕罪則剗別若髡或剪半鬢及繫牌於項以辱之犯強盜者繫終

身奸貴人妻者男子流婦人割其耳鼻賦稅則準地輸  
銀錢俗事火神天神文字與胡書異多以姊妹為妻妾  
自餘婚合不擇尊卑諸夷中最高醜穢矣百姓女年十  
歲以上有姿貌者王收養之有功勲人即分賜之死者  
多棄屍于山一月著服城外有人別居唯知喪葬事號  
不淨人若入城市搖鈴自別以六月為歲首尤重七月  
七日十二月一日其日民庶以上各相命名設會作樂  
以極歡娛又每年正月二十日各祭其先死者神龜中

其國遣使上書云大國天子天之所生願日出處常為  
漢中天子波斯國王居和多千萬敬拜朝廷嘉納之自  
此每使朝獻恭帝二年其王又遣使獻方物隋煬帝時  
遣雲騎尉李昱通波斯尋使隨昱貢方物

伏盧尼國都伏盧尼城在波斯國北去代二萬七千三  
百二十里累石為城東有大河南流中有鳥其形似人  
亦有如橐駝馬者皆有翼常居水中出水便死城北有  
云尼山出銀珊瑚琥珀多獅子

色知顯國都色知顯城在悉萬斤西北去代一萬二千九百四十里土平多五果

伽色尼國都伽色尼城在悉萬斤南去代一萬二千九百里土出赤鹽多五果

薄知國都薄知城在伽色尼國南去代一萬三千三百二十里多五果

牟知國都牟知城在忸密西南去代二萬二千九百二十里土平禽獸草木類中國



阿弗太汗國都阿弗太汗城在忸密西去代二萬三千七百二十里土多平五果

呼似密國都似密城在阿弗太汗西去代二萬四千七百一十里土平出銀琥珀有獅子多五果

諾色波羅國都波羅城在忸密南去代二萬三千四百二十里土平宜稻麥多五果

早伽至國都早伽至城在忸密西去代二萬三千七百二十八里土平少田殖取稻麥于鄰國有五果

伽不單國都伽不單城在悉萬斤西北去代一萬二千七百八十里土平宜稻麥有五果

者舌國故康居國在破洛那西北去代一萬五千四百五十里太延三年遣使朝貢自是不絕

伽倍國故休密翎侯都和墨城在莎車西去代一萬三千里居山谷間

折薛莫孫國故雙靡翎侯都雙靡城在伽倍西去代一萬三千五百里居山谷間

鉗敦國故貴霸翎侯都護漂城在折薛莫孫西去代一萬三千五百六十里居山谷間

弗敵沙國故盼頓翎侯都薄茹在鉗敦西去代一萬三千六百六十里居山谷間

閭浮謁國故高附翎侯都高附城在弗敵沙南去代一萬三千七百六十里居山谷間

大月氏國都盧監氏城在弗敵沙西去代一萬四千五百里北與柔然接數為所侵遂西徙都薄羅城去弗敵

沙二千一百里其王寄多羅勇武遂興師越大山南侵  
北天竺自乾陀羅以北五國盡役屬之太武時其國人  
商販京師自云能鑄石為五色琉璃乃採礦山中鑄于  
京師既成光澤反美于西方來者詔為行殿容百餘人  
光色映徹觀者莫不驚駭以為神明所作自此國中琉  
璃甚賤人不復珍之

安息國在葱嶺西都蔚搜城北與康居西與波斯相接  
在大月氏西北去代二萬一千五百里周天和二年其

王遣使朝獻

條支國在安息西去代二萬九千四百里

大秦國一名黎軒都安都城從條支西渡海曲一萬里  
去代三萬九千四百里其海滂出猶渤海也而東西與  
渤海相望蓋自然之理地方六千里居兩海間其地平  
正民居星布王都城分為五各方五里周六十里王居  
中城城置八臣以主四方而王城亦置八臣分主四城  
若謀國事及四方有不決者則四城之臣集議王所王

自聽之然後施行王三年一出觀風化人有冤枉詣王  
訢訟者當方之臣小則讓責大者黜退令其舉賢代之  
其人端正長大衣服車騎擬儀中國故外域謂之大秦  
土宜五穀桑麻民務蠶田多璆琳琅玕神龜白馬朱鬣  
明珠夜光璧東南通交趾又水道通益州永昌郡多出  
異物大秦西海水之西有河河西南流河西有南北山  
山西有赤水西有白玉山玉山西有西王母山玉為堂  
室云從安息西界循海曲亦至大秦四萬餘里於彼國

觀日月星辰無異中國而前史云條支西行百里日入處失之遠矣

阿鈎羗國在莎車西南去代一萬三千里國西有懸度山其間四百里中往往有棧道下臨不測之淵人行以繩索相持而度因名之土有五穀諸果市用錢為貨居止立宮室有兵器土出金珠

波路國在阿鈎羗西北去代一萬三千九百里其地濕熱有蜀馬土平物產國俗與阿鈎羗同類

小月氏國都富樓沙城其王本大月氏王寄多羅子寄多羅為匈奴所逐西徙後令其子守此城因號小月氏在波路西南去代一萬六千六百里先居西平張掖間被服與羌同其俗以金銀錢為貨隨畜牧移徙亦類匈奴其城東十里有佛塔周三百五十步高八十丈自佛塔初建計至武定八年八百四十二年所謂百丈佛圖也

罽賓國都善見城在波路西南去代一萬四千二百里



居在四山中其地東西八百里南北三百里地平溫和  
有苜蓿雜草奇木檀槐梓竹種五穀糞園田地濕生  
稻冬食生菜其人工巧雕文刻鏤織罽有金銀銅錫以  
為器物市用錢他畜與諸國同每使朝獻

吐呼羅國去代一萬二千里東至范陽國西至悉萬斤  
國中間相去二千里南至連山不知名北至波斯國中  
間相去一萬里國內有薄提城周匝六十里城南有西  
流大水名漢樓河土宜五穀有好馬駝騾其王曾遣使

朝貢

副貨國去代一萬七千里東至阿富汗使且國西至沒誰  
國中間相去一千里南有連山不知名北至奇沙國相  
去一千五百里國中有副貨城周匝七十里宜五穀蒲  
桃惟有馬駝騾國王有黃金殿殿下有金駝七頭各高  
三尺其王遣使朝貢

南天竺國去代三萬一千五百里有伏醜城周匝十里  
城中出摩尼珠珊瑚城東三百里有拔賴城城中出黃

金白真檀石蜜蒲桃土宜五穀宣武時其國王婆羅化遣使獻駿馬金銀自此每使朝貢

疊伏羅國去代三萬一千里國中有勿悉城城北有鹽奇水西流有白象并有阿末黎木皮中織作布土宜五穀宣武時其國王伏多末多遣使獻方物自是每使朝貢

拔豆國去代五萬一千里東至多勿當國西至旃邠國中間相去七百五十里南至屬陵伽國北至弗那伏且

國中間相去九百里國中出金銀雜寶白象水牛犛牛  
蒲萄五果土宜五穀

噉國

隋書作挹怛國

大月氏種類亦曰高車別種其原出於塞北自金山而  
南在于闐西都烏許水南二百餘里去長安一萬一百  
里其王都拔底延城蓋王舍城也其城方十里餘多寺  
塔皆飾以金風俗與突厥畧同兄弟共一妻夫無兄弟

者妻戴一角帽若有兄弟者依其多少之數更加帽角衣服類加以纓絡頭皆剪髮其語與柔然高車及諸胡不同衆可十萬無城邑依隨水草以氈為屋夏遷涼土冬逐暖處分其諸妻各在別所相去或二百三百里其王巡歷而行每月一處冬寒時三月不徙王位不必傳子子弟堪者死便受之其國無車有輿多駝馬用刑嚴急偷盜無多少皆腰斬盜一責十死者富家累石為藏貧者掘地而埋隨身諸物皆置塚內其人凶悍能鬪戰

西域康居于闐沙勒安息及諸小國三十餘皆役屬之  
號為大國與柔然婚姻自太安後每遣使朝貢正光末  
遣貢獅子一至高平遇万俟醜奴反因留之醜奴平送  
京師永熙後朝獻遂絕大統十二年遣使獻其方物廢帝  
二年周明帝二年並遣使來獻後為突厥所破部落分  
散職貢遂絕隋大業中又遣使朝貢方物其國去漕國  
千五百里東去瓜州六千五百里

朱居國在于闐西其人山居有麥多林果咸事佛語與

于闐類役屬噉

渴盤陁國在葱嶺東朱駒波西河經其國東北流有高  
山夏積雪霜亦事佛道附於噉

鉢和國在渴盤陁西土尤寒人畜同居穴地而處又有  
大雪山望若銀峯其人唯食餅麪飲麥酒服氈裘有二  
道一道西行向噉一道西南趣烏耆亦為噉所統  
波知國在鉢和西南土狹民貧依託山谷其王不能總  
攝有三池傳云大池有龍王次者有龍婦小者有龍子

行人經之設祭乃得過不祭多困風雪

賒彌國在波知南山居不信佛法專事諸神亦附嘍噠  
東有鉢盧勒國路險緣鐵鎖度不見底熙平中宋雲等  
竟不能達

烏菟國在賒彌南北有葱嶺南至天竺婆羅門胡為其  
上族婆羅門多解天文吉凶之數其主動則訪決土多  
林果引水灌田豐稻麥事佛多諸寺塔極華麗人有爭  
訴服之以藥曲者發狂直者無恙為法不殺犯死罪惟



徙于靈山西南有檀特山山上立寺以驢數頭運食山下無人控御自知往來

乾陀國在烏菟西本名業波為噉噉所破因改焉其王本敕勒臨國已二世矣好爭戰與罽賓戰三年不能人怨苦之有闐象七百頭十人乘一象皆執兵仗象鼻縛刀以戰所都城東南七十里有一佛塔高七十丈周三百步即所謂雀離佛圖也

康國乃康居之後遷徙無常不恒故地自漢以來相承

不絕其王本姓溫月氏人舊居祁連山北昭武城因被  
匈奴所破西踰葱嶺遂有國枝庶各分王故康國左右  
諸國並以昭武為姓示不忘本也王字世夫畢為人寬  
厚甚得衆心其妻突厥達度可汗女都于薩宝水上阿  
祿迪城多人居大臣三人共掌國事其王索髮冠七寶  
金花衣綾羅錦繡白疊其妻有髻幪以皂巾丈夫剪髮  
錦袍名為彊國西域米國史國曹國何國小安國那色  
波國烏那曷國穆國皆歸附之有胡律置於祆祠將決

罰則取斷之重者族次罪者死賊盜截其足人皆深目  
高鼻多髯善商賈諸夷交易多湊其國有大小鼓琵琶  
五絃箜篌婚姻喪制與突厥同國立祖廟以六月祭之  
諸國皆助祭奉佛為胡書氣候溫宜五穀勤脩園蔬樹  
木滋茂出馬駝騾犴牛黃金硃砂賁香阿薩那香瑟瑟  
麋皮氍毹錦疊多蒲萄酒家富或致千石連年不敗大業  
中使遣使貢方物後遂絕

安國漢時安息國王姓昭武與康國王同族字設力婁

康國王女都在那密水南城有五重環以流水宮殿皆  
平頭王坐金駝座高七八尺每聽政與妻相對大臣三  
人評理國事風俗同康居唯妻其姊妹及母子遞相禽  
獸此為異也隋煬帝即位遣司隸從事杜行滿使西域  
至其國得五色鹽而返國西百餘里有畢國可千餘家  
其國無君長安國統之大業五年遣使貢獻後遂絕  
石國居於藥殺水都城方十餘里其王姓石名湼國城  
東南立屋置座于中正月六日七月十五日以王父母

焚餘之骨金甕盛置牀上巡繞而行散以花香雜果王  
率臣下設祭禮終王與夫人出就別帳臣下以次列座  
享宴而罷有粟麥多良馬其俗善戰曾貳于突厥射匱  
可汗滅之令特勒旬職攝其國事南去鏐汗六百里東  
南去瓜州六千里旬職以隋大業五年遣使朝貢後不  
復至

女國在葱嶺南其國世以女為王姓蘇毗字末羯在位  
二十年王夫號曰金聚不知政事國內丈夫唯以征伐

為務山上為城方五六里人有萬家王居九層之樓侍  
女數百人五日一聽朝復有小女王共知國中其俗婦  
人輕丈夫而性不妬忌男女皆以彩色塗面一日中或  
數度變改人皆披髮以皮為鞋課稅無常氣候多寒以  
射獵為業出鉤石朱砂麝香犛牛駿馬蜀馬尤多鹽恒  
將鹽向天竺興販其利數倍亦數與天竺党項戰爭女  
王卒國中厚餼金錢求死者族中之賢女二人一為女  
王次為小王貴人死則取皮以金屑和骨肉置甕中埋

之經一年又以皮肉於鐵器埋之俗事阿修羅神又有  
樹神歲初以人祭或用獼猴祭畢入山祝之有一鳥如  
雌雉來集掌上破其腹視之有粟則年豐沙石則有災  
謂之鳥卜隋開皇六年遣使朝貢後遂絕

鏐汗國都葱嶺之西五百餘里古渠搜國也王姓昭武  
字阿利柴都城方四里勝兵數千人王坐金羊牀妻戴  
金花俗多朱砂金鐵東去疏勒千里西去蘇對沙那國  
五百里西北去石國五百里東北去突厥可汗二千餘

里東去瓜州五千五百里隋大業中遣使貢方物

吐火羅國都葱嶺西五百里與挹怛雜居都城方二里  
勝兵者十萬人皆善戰其俗奉佛兄弟同一妻每一人  
入房戶外挂其衣為志生子屬其長兄其山穴中有神  
馬每歲牧馬于穴所必產名駒南去漕國千七百里東  
去瓜州五千八百里大業中遣使朝貢

米國都那蜜水西舊康居之地無王其城主姓昭武康  
國王支庶字閉拙都城方二里勝兵數百人西北去康



欽定四庫全書

卷一百八十七

國百里東去蘇對沙那國五百里西南去史國二百里東去瓜州六千四百里大業中頻貢方物

史國都獨莫水南十里舊康居地其王姓昭武字狄遮亦康國王支庶都城方二里勝兵千餘人俗同康國北去康國二百四十里南去吐火羅五百里西去那色波國二百里北去米國二百里東去北米國二百里東去瓜州六千五百里大業中遣使貢方物

曹國都那密水南數里舊康居地國無主康國王令子

烏建領之都城方三里勝兵千餘人國中有得悉神自  
西海以東諸國並敬事之其神有金人一焉金破羅闊  
丈有五尺高下相稱每日以駝五頭馬十匹羊一百口  
祭之常有數千人食之不盡東南去康國百里西去何  
國百五十里東去瓜州六千六百里大業中遣使貢方  
物

何國都那密水南數里舊康居地其王姓昭武亦康國  
王族類字數都城方二里勝兵者千人其王坐金羊座

東去曹國百五十里西去小女國三百里東去瓜州六千七百五十里大業中遣使貢方物

烏那遏國都烏訥水西舊安息地王姓昭武亦康國王種類字佛食都城方二里勝兵數百人王坐金羊座東北去安國四百里西北去穆國二百餘里東去瓜州七千五百里大業中遣使貢方物

穆國都烏訥河之西亦安息故地與烏那遏為隣其王姓昭武亦康國王種類字阿濫密都城方三里勝兵二

千人東北去安國五百里東去烏那遏二百餘里西去波斯國四千餘里東去瓜州七百里大業中遣使貢方物

漕國在葱嶺北漢時屬賓國其王姓昭武字順達亦康國王宗族都城方四里勝兵者萬餘人國法嚴殺人及賊盜皆死其俗重淫祠葱嶺山有順天神者儀制極華金銀鑠為屋以銀為地祠者日千餘人祠前有一魚脊骨有孔中通馬騎出入國王戴金魚頭冠坐金馬座上

多稻粟豆麥饒象馬犂牛金銀鑛鐵氍毹朱砂青黛安息青木等香石蜜黑鹽阿魏沒藥白附子北去帆延七百里東去剗國六百里東北去瓜州六十六百里大業中遣使貢方物

伽藍記曰燉煌人宋雲與惠生向西域發京師西行四十五日至赤嶺即國西疆也魏關防在此赤嶺不生草木因以為名其山鳥鼠同穴異種共類鳥雄鼠雌共為陰陽即所謂鳥鼠同穴發赤嶺西行二十日

渡流沙至吐谷渾國路中甚寒多饒風雪飛砂走礫  
舉目皆滿唯吐谷渾城煖于餘處其國有文字同魏  
風俗治政多為夷法從吐谷渾西行三千五百里至  
鄯善城從鄯善西行一千六百四十里至左末城城  
中居民可百家土地無雨決水種麥不知用牛耒耜  
而田從左末城西行一千二百七十五里至末城傍  
花果似洛陽惟土屋平頭為異從末城西行二十二  
里至捍戩城南十五里有一大寺像塔數千懸綵幡

萬計魏國之藩過半矣藩上隸書多云太和十九年  
景明二年延昌二年從捍廢城西行八百七十八里  
至于闕國王頭著金冠似雞幘頭後垂二尺生絹廣  
五寸以為飾威儀有鼓角金鈿弓箭一具戟二枚槊  
五張左右帶刀不過百人其俗婦人袴衫束帶乘馬  
馳走與丈夫無異死者火焚收骨葬之上起浮圖居  
喪者剪髮劈面為哀唯王死不火置棺中遠葬于野  
立廟祭祀神龜二年七月二十九日入朱駒波國人

民山居五果甚豐食則麥麴不立屠殺食肉者以自  
死肉風俗言音與于闐似文字與婆羅門同其地疆  
界可五日行遍八月初入漢盤陀國界西行六日登  
葱嶺山復西行三日至鉢犍城三日至不可依山其  
處甚寒冬夏積雪自此以西山路欹側危坂千里懸  
崖萬仞極天之阻實在於斯自發葱嶺步步漸高如  
此四日乃得至嶺依約中夏實半天矣漢盤陀國正  
在山頂自葱嶺已西水皆西流入西海世人云是天



地之中人民決冰而種聞中國待雨笑曰天何由可  
期也城東有孟津河東北流向沙勒葱嶺高峻不生  
草木是時八月天氣已寒北風驅雁飛雪千里九月  
中旬入鉢和國國王所住因山為城人民服飾惟有  
氈衣地土甚寒窟穴而居風雪勁切人畜相依國之  
南界有大雪山朝融夕結望若玉峯十月初旬入噉  
達國土田庶衍山澤彌望居無城郭游軍而治以氈  
為屋隨逐水草夏則隨涼冬則就溫鄉土不識文字

禮教俱闕陰陽運轉莫知其度年無盈閏月無大小  
用十二月為一歲受諸國貢獻南至牒羅北盡勅勒  
東被于闐西及波斯四十餘國皆來朝貢王居大氈  
帳方四十步周迴以氈氍為壁王著錦衣坐金牀以  
四金鳳為牀脚見魏使再拜跪受詔書至於設會一  
人唱則客前後唱則罷會唯有此法不見音樂王妃  
亦著錦衣垂地三尺使人擎之頭戴一角長八尺奇  
長三尺以玫瑰五色裝飾其上王妃出則輿之入生

欽定四庫全書

卷一百八十七

金牀以六牙白象四獅子為牀自餘大臣妻皆隨傘頭亦似有角團圓下垂狀似寶蓋觀其貴賤亦有服章四夷中最為強大諸國奉獻甚饒珍異十一月初入波斯國境土甚狹七日行過人民山居資業窮煎風俗凶慢見王無禮國王出入從者數人其國有水昔日甚淺後山崩截流變為二池毒龍居之多有災異夏喜暴雨冬則積雪行人艱難雪有白光照耀人眼閉目茫然無見祭祀龍王然後平復十一月終旬

入賒彌國此國漸出葱嶺土田峻峭民多貧困峻路  
危道人馬僅通一直一道從鉢盧勒國向烏場國鐵  
鎖為橋懸虛為度下不見底旁無挽提倏忽之間投  
軀萬仞行者望風謝路十二月初入烏場國北接葱  
嶺南連天竺土氣和暖地方數千國王精進菜食長  
齋晨夜禮佛擊鼓吹貝琵琶箏篪笙簫備有日中後  
始治國事假有死罪不立殺刑惟徙空山任其飲啄  
事涉疑似以藥服之清濁則驗隨事輕重當時即決

上田肥美人物豐饒百穀盡登五果繁熟土饒異花  
冬夏相接國王見雲來拜受詔書問雲曰卿是日出  
人耶雲曰我國東界有大海水日出其中王又問曰  
彼國出聖人否雲具說周孔莊老之德次叙蓬萊山  
上銀闕金堂神仙聖人並出其上說管輅善卜華佗  
治病左慈方術分別說之王曰若如卿言即是佛國  
我當命終願生彼國城北有陀羅寺佛事最多雲惠  
生見彼比丘戒行精苦觀其風範特加恭敬遂捨奴

婢二人以供灑掃去王城東南山行八日高山龍從  
危岫入雲嘉禾靈芝叢生其上林泉婉麗花綵曜日  
雲與惠生割捨行資於山頂造浮圖一所刻石隸書  
銘魏功德王城西南五百里有善持山山谷和暖山  
木冬青當時太簇御辰溫風已扇鳥鳴春樹蝶飛花  
叢雲遠在絕域屬此芳景歸思軫中遂動舊疹纏綿  
經月得婆羅門呪然後平善至正光元年四月中旬  
入乾羅陀國土地亦與烏場國相似本名業波羅國

為噉噬所滅遂立敕慙為王治國以來已經二世立  
性暴凶多行殺戮自恃勇力與屬賓爭境連兵戰鬪  
已歷三年王有鬪象七百頭一負十人手捉刀揜象  
鼻縛力與敵相擊王常停境上終日不歸雲詣軍通  
詔王凶慢無禮坐受詔書雲見其遠夷不可制未能  
責之王遣傳事謂雲曰卿涉諸國經過嶮路得無勞  
苦也雲曰我皇帝深味大乘遠求經典道雖嶮未敢  
告疲王親總三軍遠臨邊境寒暑驟移不無損敝王

答曰不能降服小國愧卿此問雲初見王是夷人謂  
不可禮責及親往復乃有人情遂責之曰山有高下  
水有大小人處世間亦有尊卑噉噬烏場王並拜受  
詔書王何獨不拜王曰我親見魏王則拜得書坐讀  
有何可怪世人得父母書猶自坐讀大魏如我父母  
我亦坐讀於理無失雲無以屈之遂將雲至一寺供  
給甚薄時拔提國送獅子兒兩頭意氣雄猛中國所  
畫莫參其儀復西行至佛沙伏城川原沃壤民戶殷



多土饒珍寶風俗淳善復西行乘舟渡一深水三百餘步復行西南六十里至乾陀羅城東南七里有崔離浮圖圖南五十荅有一石塔高二丈甚有神變能與人報吉凶觸之若吉者金鈴鳴應若凶者搖撼亦不鳴惠生旣在遠國乞求一驗以指觸之鈴即鳴應後果得吉反初惠生發京師皇太后敕付五色百尺幡千口錦香袋五百枚王公卿士幡二千口惠生自于闐至乾陀所有佛事處悉皆流布至此頓盡雲以

奴婢二人捨雀離浮圖永充洒掃惠生遂減割行資  
妙簡良匠以鑄石摹寫雀離浮圖儀一軀及釋迦四  
塔變于是西北行七日渡一大水至瞿羅羅鹿見佛  
影入山窟十五步四面向戶遙望則衆相炳然近看  
暝然以手摩之唯有石壁漸漸却行始見其相容顏  
挺特世所希有惠生在烏場國二年西胡風俗大同  
小異不能具錄至正光二年二月始還得經一百七  
十部皆大乘妙典也又曰佛法經像盛于洛陽異國

沙門咸來輻輳負錫持經適茲洛土西域遠者乃至  
大秦國盡天地之西陲百姓野居邑房相望衣服車  
馬擬議中國南中有歌營國去京師甚遠世不與中  
國通今始有沙門焉曰菩提拔陀自云北行一月至  
勾稚國北行十二日至孫典國從孫典國北行三十  
日至扶南國方五千里南夷之國最為大民戶殷富  
多出明珠金玉及水晶珍異饒檳榔從扶南國北行  
一月至林邑國出林邑後至揚州歲餘隨揚州比丘

法融來至京師京師沙門問其南方風俗拔阨云古  
有奴調國乘四輪車駕馬斯調國出火浣布以樹皮  
為之其樹入火不燃凡南方諸國皆因城郭而居多  
饒珍麗民俗淳善質直好義亦與西域大秦安息身  
毒諸國交通往來或三方四方俱浮海乘風百日便  
至

論曰自古開遠夷通絕域必因宏放之主好事之臣張  
騫鑿空於前班超投筆於後或結以重寶或懾以利劍

投驅萬死之地以要一旦之功皆由主尚來遠之名臣  
徇輕生之節是知上之所好下必效焉西域雖通魏氏  
時中原始平天子方以混一為心未遑及此其信使往  
來得羈縻勿絕之道及隋煬帝規模宏侈掩吞秦漢裴  
矩方進西域圖記以蕩其心故萬乘親出玉門關置伊  
吾且末鎮而闢右暨於流沙騷然無聊生矣若使北狄  
無虞東夷告捷必將修輪臺之戍築烏壘之城求大秦  
之明珠致條支之烏卵往來轉輸將何以堪其弊哉古

者哲王之制也方五千里務安中夏不事要荒豈威不能加德不能被蓋不以四夷勞中國不以無用害有用也是以秦成五嶺漢事三邊或道殣相望或戶口減半隋室恃其強盛亦狼狽青海此皆一人失道故億兆罹殃戴思即叙之義固辭都護之請返其千里之馬不求白狼之貢則七戎九夷候風重譯雖無遼東之捷豈及江都之禍乎案西域開於漢年世積久雖離併多端見聞殊說此所以前書後史踳駁不同豈其好異地遠故

也人之所知未若其所不知信矣

南北史合注卷一百八十七